

Iwwer su Eckbänk

Als merr omm Sunndaach zesomme gesetze hawwe, de Karl, de Schorsch unn ich unn aach donn vumm Hinkelsche uffs Giggelsche kumme sinn, frächt uff oomol de Karl: No Schorsch, iss doi ald Kautsch jetz fort?

De Schorsch hott genickt. Ja, jetz isse fort, awwer die nei Kautsch iss werklisch schee, die hält uns aus.

No siehde, saach isch, unn doo hosde de erst su enn Uffstonnd gemacht.

Merr derrf sich nitt alles gefalle losse, moont doo de Schorsch, awwer omm End habb isch oigeseh, dass die ald fort muss.

De Karl hott enn Schluck Äbbelwoi gedrunke, donn seeder: Mir hawwe in de Kisch su e schee Eckbonk, ihr kennt die joo, die hawwe merr schunn iwwer zwonnisch Johr unn die bleibt stieh, bis merr nimmi doo sinn, donn kenne die Kinner demett mache wasse wolle.

Isch habbem Karl zugestimmt. Uns giehts genau su, aach unser Eckbonk dut bleiwe, weil die basst in die Esseck. Finf Leit kenne druff sitze unn wenn kooner druffsitzt kann merr sich aach emol druff ausstrecke – naa, die bleibt uns aach erhalle.

Su Eckbänk, moont doo de Karl, duts die eischendlich noch gewwe? Also in dene Katalooche, die merr su ins Haus kriecht, muss merr die suche. Scheene Stiehl duts gewwe, scheene Disch ferr die Essecke, awwer Eckbänk? die sieht merr kaum noch.

De Schorsch hott die Achsele gezuckt. Villeischd sinn su Eckbänk nimmi modern. Mir hadde joo aach emol oo, awwer die iss schunn long fort, jetz hawwe mir aach nor noch Stiehl um de Disch. Unn wennde dich ausstrecke willst, mussde dich uff die Kautsch leesche.

Die Karl hott gegrinst. Uff die nei Kautsch. Schorsch, zieh immer e frisch Hemd unn e frisch Hos oo, wennde dich druffleesche dust.

De Schorsch hott e bissi schebb geguggd. Schleeschdschwätzer!

Ach wissderr, saach isch, unser Enkel, bei dene dehoom duts joo aach koo Eckbonk gewwe, unn wie die Fraa unn isch de letzt gefeiert hawwe, doo hott unser ältst Dochter e Redd gehalle unn hott Donkeschee gesaad ferr dess, was merr unserne Kinner ferrs Lewe mettgewwe hawwe, awwer aach ferr die Eckbonk, weil dess wär de Mittelpunkt in unserm Haus unn dess deede aach ihr Kinner, also unser Enkel, saache, grad die Eckbonk bei de Oma unn beim Opa wär e gut Stick Heimat. No ja, villeischd nitt nor weesche de Eckbonk kumme unser Kinner unn aach die Enkel immer widder gern bei uns.

Moi zwaa Kummbeern warn enn Aacheblig still unn hawwe driwwer noochgedenkt.

Donn seet de Schorsch: Ob Eckbonk odder nitt, su ähnlich deede dess aach unser Kinner unn Enkel saache, weil die fiele sich werklisch immer wohl bei uns.

Die kumme nor su selten, moont doo de Karl

Ei sei doch fruh, saach isch, die kumme nor donn effderr, wenn ooner vunn uns kronk iss, awwer donn sinnse gleich doo.

Eiern Honnes